



I N T R O I T V S.



Cum (quod absque ulla arte divinatoria, ac prophetica facile quis prævidere poterat) Urbi nostræ summam diem, diem scilicet obsidionis, diem luctus, diem excidii venire persentiscerem; inter arma leges filere, atque Calliopen hostili curru inconcinne circumduci ratus, litterariam suppellectilem meam tempestivus confarcinabam, ac paulo post largas inter lacrymas valedicens civitati, valedicens foro, valedicens domui, valedicens Musæo vicinum petebam locum. Procul negotiis, procul libris, genioque unice relicto mihi nil supererat, quam cogitare, ac, quod exinde profluit, innumeros conceptus, qui græce *ἐνοῖαι ἐνδυμήματα*, atque etiam dicuntur, fabricari, atque ideas formare. Mox universi me occupabat systema Imperii, mox de particularibus sollicitus eram ditionibus, mox commune Europæ malum me involvebat, mox pertractabam variam Martis aleam, mox possibiles futuræ Pacis con-



ditiones animo obverfabantur, mox sortem, fortunamque meam contemplantur, mox propria mea damna me movebant, mox in admirationem hostilis citationis raptabar, mox aliorum fata novas curas injiciebant, mox medicinam parare allaborabam, mox castra, bellicique apparatus largam cogitandi materiem suppeditabant, mox duram agricolarum aspiciebam conditionem: mox inconsulta, quæ minus æquus Amaryllidis meæ servus suggerebat, consilia variam in partem me agitabant, mox etiam cum Marone agrestem meditabar musam. Verbo: tot, tantisque conceptibus implicabar, ut me in fine deviantem comprehenderem. Quocirca revocavi animum, et Novellatores, seu conceptuum fabricatores, eorumque naturam, conditionem, qualitates, genera, notasque characterificas penitus perscrutari aggressus sum. Atque hæc præsentium origo est meditationum, quas apud Ubios hospes, medios inter armorum strepitus absolvi, textus contra, allegationesque jure postliminii quasi restitutus ad Aquam Dusselam decima quarta Octobris 1759.

